



Les deux filles de Loth le font enyurer pour auoir lignée de luy.

BRAHAM vid monter au Ciel la grande fumée de la subuersion de Sodome & Gomorre, dont le Seigneur auoit preferué Loth & ses deux filles, lesquels s'estans retirez en Segor n'y firent que peu de sejour, pour la crainte qu'ils auoient que Segor ne fust aussi abysmée. Parquoy ils se retirerent és cauernes des montagnes. Alors l'aînée des filles de Loth dit à la plus ieune, Nostre pere est ja vieil, & il n'y a aucun sur la terre qui nous puisse connoistre selon nature; Donnons du vin à boire à nostre pere, & couchons avec luy, afin que d'iceluy nous conseruions semence. Elles donnerent donc du vin à boire à leur pere, & l'aînée coucha avec luy cette nuit; & Loth ne s'aperceut point quand elle se coucha, ne quand elle se leua. Ainsi fit la plus ieune, & il ne s'aperceut point aussi quand elle se coucha, ne quand elle se seua. Ainsi les deux filles de Loth conceurent de leur pere, desquelles l'aînée enfanta vn fils nommé Moab, qui fut pere des Moabites. Et la plus ieune enfanta Amon, dont sont issus les Ammonites, qui iusques à present sont Nations assez renommées.